

## Pablo Timoteo Afianã Kirika Kenexõ Fomani

### *Pablo Timoteo yoisharani*

<sup>1</sup> Ëkĩa Pablo ẽ mia kirika kenexõ fomai. Epa Niospa fichipaiyai keskafakĩ Cristo Jesús ea katoni aõnoa ãfe meka shara ẽ yoifofãsafanõ. Ea yoini iskafakĩ: “Keyokõi yorafo yoife iskafakĩ: ‘Jesucristo matoõnoax nãxonni mato chaka mato soaxoxiki nã chanĩmara faafo tii afe nĩpaxanõfo,’ ixõ ato yoife nã ẽ mia yoiai keskafafe,” ixõ Jesús ea yoini. <sup>2</sup> Timoteoshta, ẽ mĩo noikĩ ẽ mia kirika kenexõ fomai mĩ tãpinõ. Epa Nios nõko Ifo Cristo Jesús feta mia noikĩ mia shara famanõfo. Askatari mĩ shinã mẽra mia shinãmasharakõinõfo mĩ õiti fekaxtenõma.

### *Ato Jesúsnoa yoisharafe*

<sup>3</sup> A ẽfe xinifãfe Epa Nios yonoxosharaponifo keskari fakĩ, ẽri a yonoxosharai. Ẽ mẽraxõ ẽ afaa shinãchakayama-fai ẽ yonoxosharai. Nãskakẽ ẽ mia Nios kĩfixõfafãini aicho fakĩ. Pena tii yafi fakish tii ẽ mia Nios kĩfixõfafãini. <sup>4</sup> Nãskakẽ mẽ oaino, mĩ ea shinãi oiaito ẽ mia õiferani. Nãskakẽ ẽ anã mia õisharapai, mia õi ẽ inimasharakõixiki. <sup>5</sup> Taefakĩkõi mĩ chichi Loida Jesús Ifofani. Askata mĩ efa Euniceri Jesús Ifofani. Afãfe Ifofasharakõimisfo keskafakĩ, mĩri Ifofasharai. Mẽ mia tãpia mĩ Ifofasharakõiaito nãskakẽ ẽ mia yoi.

<sup>6</sup> Anã shinãmakiyamafe ẽ mia mãmãxõ ẽ mia Nios kĩfixoni. Nãskakẽ Niospa mia katoni Jesús yoimis mĩ inõ. Mã chii nokakẽ nõ anã xofisa fatiro anã xofisanõ. Nãskarifiakĩ mĩ anã yorafo ato yoipaima mã mĩ xokenãifinaxõ askara meekĩ mĩ Nios kĩfitiro anã mia õiti fepeaxosharanõ, mĩ anã ato yoisharanõ inimayanã a mĩ taefakĩ ato yoini

keskafakī. <sup>7</sup> Nāskakē Niospa Yōshi Sharapa noko yorafoki mesematama. Aōxō afama mīshti noko amatiro. Askatari noko ato noimasharai. Aōxori noko shināmasharatiro anā nō chakafanōma. <sup>8</sup> Askafai rāfiyamafe Jesúsnoa yorafo yoitafāfe rāfikima. Askatari eōri rāfiyamafe. Ē Jesucristo ato yoirifaito ea karaxa mēra ikimatifoki. Mīri Jesús ato tāpimasharafe; mī askaito, miari omiskōimanaifono rateyamafe. Jesúsnoax mī omiskōiaito, Niospa mia axoxii. <sup>9</sup> Akka Niospa āfe Fake Cristo Jesús noko nīchixononi nokoōnoax nāxoyonō nōko chaka noko soaxoxiki. Askaxō noko shināni afe yora nō inō. Nō yora chakafofiakē Niospa noko noimis. Taefakīkōi Niospa mai onifaxoma, a inōpokoai tāpixō, noko shināni noko ifixixakī Jesúsxō. <sup>10</sup> Jesús noko ano oamatai Niospa noko ifipaiyai anori nō tāpipaonima. Akka rama iskaratīa mā nō tāpia noko ifimis Jesucristo noko nāxoni. Nāskax iskaratīari nō nai, nō rateima omiskōipakenakafo mēra nō kairoko. Nō Nios ari kaax anā nō naxima. Jesús noko chaka soaxonano nō Nios ari nīpanaka. Mā iskaratīa nō tāpia Jesús noko nāxoni nō chiifā mēra kanōma noko ifiano.

<sup>11</sup> Niospa ea katonī na meka shara Cristoōnoa yora fetsafo ē ato tāpimanō. <sup>12</sup> Nāskakē ē karaxa mēranoax Cristoōnoax omiskōifi ē rāfima. Ē Jesús tāpikōiax chanīmara fayanā. Jesús ēfe chaka taefakī ea soaxonitīa ē Epa Nios iskafakī yoini: “Epa Niosi, ea kexesharapakexafe Jesús afianā oaitīa,” ixō ē yoini keskara ea axoxii ē chanīmara fakōini.

<sup>13</sup> Na ē Cristo Jesúsnoa mia chanīmakōi tāpimana shināmakiyamafe. Ē mia mēstekōi tāpimana keskafakī, nāskari fakī ato tāpimafe. Cristo Jesús chanīmara fakī afe rafekī aōxō yorafo noife mī afe rafeakī. <sup>14</sup> Nā ē mia yoia keskara mī mēraxō shināfe, shināmakixikima. Āfe Yōshi Shara mī mēra ikano mefeta aki. Ōifāi, Niospa mia yoia keskafakī

kachikiri fayamafe.

<sup>15</sup> Mā mī tāpia keyokōichi chanīmara faafo Asia mai anoafāfe ea ōifainafo. Askatari ato feta Figelo feta Hermógenesri ea ōifainafo ato fe fokākī. <sup>16-17</sup> Akka Onesíforokai askanima, eō rāfinima ē karaxa mēra ikikē. Nāafi Roma ano nokoxō pena tii ea fenafafāikī ea karaxa mēranoa fichita, ea ōiyoi nā otitaiapaoni mēxotaima ea ōifaa ōifakī, ea pishta inimamani. Nāskakē nōko Ifāfe Onesíforo āfe āfinō āfe fakefonō Efeso anoxō ato noikī ato kexesharaxonō. <sup>18</sup> Onesíforo Efeso anoxori ea yonosharaxopaoni, mīfi a ōixō tāpisharakī. Jesucristo anā fotoxō noko ichanāfaxō Onesíforoki inimakōikī noikī axosharaino ē askara fichipai.

## 2

*Nō Jesús Ifofakī oa soraronō āfe xanīfo nikakōiai keskafakī nōri Nios nikasharakōitiro*

<sup>1</sup> Timoteoshta, Jesucristo āfe kerex sharaðnoax isharafe, afaa chakafaxima. <sup>2</sup> Ē yorafo Jesúsnoa yoiaito mīri ea nikafafāini. Nāskarīfiai mī ato chanīmara fasharatiro. Nāskaxō a feronāfakefāfe a shinā sharaifo ifife mī ato tāpimaxikī afāferi fetsafo tāpimanōfo.

<sup>3-4</sup> Akka soraro ōiti sharayato omiskōifikī tenetiro. Āfe pexe shināyamata āfe xanīfo fisti ifofaxō nikasharakōi. A afara yonoai keskara āfe xanīfāfe yonomanaino soraro sharapa yonosharatiro. Nāskarīfakī Niospa mia yonomapaiyai keskari fakī yonosharaxōfe fanīrira fetsa shinākima. Jesúsnoax omiskōifi meseyamafe. <sup>5</sup> Askatari fetsafo xonōnōnāxikakī ĩkisi itipinīsharatirofo xonōnōnāpaikani. Askatari mīri shināsharafai Niospa mia yoiaito nikasharakōife. Akka mī nikasharayamaito Niospa mia, “Aicho, mī fāsi sharakōi,” ixokai mia yoitiro. <sup>6</sup> Askatari feronāfāke yonosharamiskōi āfe tare efapafaxō, ĩkisi āfe

yono fitiro pixikī. Nāskarifiakī mīri Jesúsnoa yonox-osharamis Jesús mikiki inimakōinō mia afara shara ināxii. <sup>7</sup> Ē mia yoiai keskara shināsharafe. Nōko Ifāfe mato tāpimasharai kiki.

<sup>8</sup> Nāskakē shināmakiyamafe Jesucristo naafiakē anā Niospa otofani noko ifimis inō. Nā David āfe fena. Nānori nā meka shara ē yoifafāimis. <sup>9</sup> Nā ē yoifiaito, yorafāfe Jesús Ifofaafoma ōitifishkikakī. Ē Niospa mekasharaōnoa yoiaino ekeki ōitifishkikakī ea karaxa mēra ikimanafo. Ē afaa chakafayamafiakē ē feronāfake chaka keskarakē ea karaxa mēra ikimanafo. Ea ikimafianifono Niospa meka Jesucristoōnoa ē enetiroma. <sup>10</sup> Nāskakē ē atoōnoax omiskōifikī ē tenekōi a Jesús Ifofaafō tii ē ato tāpimani chanīmara fanōfo, Nios fe ĩpaxakakī.

<sup>11</sup> Na meka sharakōi nikafe:

Nō Jesúsnoax nakī nō chanīmara faax nō afe ĩpanaka.

<sup>12</sup> Askatari nō Jesúsnoax omiskōifikī nō tenei, nō Jesús fe Epa Nios ariax xanīfo ĩpanakakī. Akka nō Jesús potakī, “Niospa fakemara,” ixō nō askafaito Jesús noko yoitiro iskafakī: “Mā ea Niospa Fakemara faito ēri mato kopitiro iskafakī: Mī ēfe fakema,” fakī noko fatiro.

<sup>13</sup> Askatari nō Jesús nikayamai nō isharayamafimisno, akka akai askarama, aroko isharakōimis. Aatokai afaa chanī yoimisma, āfe meka chanīmakōi. Aakai ōiti ranāyama.

*Afe keskara a Niospa meka yoimis shara itiomē* Nios akiki inimanō

<sup>14</sup> Na ē mia yoiai anori, mefe yorafo ichanāmisfo ato shināma fafāife. Niospa mia xafakīa ōiaino ato yoife Niospa mekaōnoa feratenānōfoma, feratenākani aōnoax mekanōfoma. Akka fatotokai yoisharaimākai fatotori yoisharaimamākai ikaxō tsōa tāpitiroma tāpipai kakī. Anorima nika kakī tsōa tāpitiroma. Askakani

fanĩrira mekamisfo āa chanĩkani. <sup>15</sup> Timoteo, Niospa meka pena tii ōife. Askafaxō Niospa meka tāpisharaxō yorafo mēstekōi ato tāpimafafāife. Mĩ askaito Niospa mĩōnoa yoitiro iskafakĩ: “Na ea yonoxosharamis, ē akiki inimasharakōi,” ixō mĩōnoa yoixiki. Mia askafainokai mĩ aō rāfitiroma. <sup>16</sup> A feratenāmisfo āto meka nikayamafe. Nō āto meka nikaxō meka mēstekōi Jesúsnoa nō nika-paitiroma. Askaxō anā nō Nios Ifofapaitiroma. Chakakōi itiro. <sup>17</sup> Oa yora faraxiki finaxō, koofi payokometiro keskafakĩ, a yōra anorima yoikĩ yorafo āto ōiti chakana fatiro. Himeneo feta Fileto askara chakakōi ato yoimisfo. <sup>18</sup> A Jesús oaitĩa a namisfo anā otoviaifo mā nō tāpifekē, a feronāfake rafeta Himeneo feta Fileto anorima mato yoimisfo. Akka nō tāpia mā Jesús anā fotoaino Epa Niospa nā namisfo otofaxii. Akka nā rafeta mato pāramisfo āa chanĩkakĩ. Iskara mato yoimisfo: “Mā finōa a mato yoimisfo keskara. A Niospa namisfo mā ato otofaa,” ixō a refeta yoimis. Afāfe nā meka nikaxō shinākĩ iskafatirofo: “Ooa. Mā nō nakē Niospa noko anā otofaima,” ixō anorima shinātirofo. Anori shinākani Jesús shināmaki-tirofo. <sup>19</sup> Akka Niospa meka chanĩmakōi. Tokirinĩfakai tsōa rafetiroma. Niospa meka nāskarari. Tsōakai āfe meka fetsafatiroma. A chanĩma, nā yoimis keskara nāskararakōi. Tokirinĩfakĩ yōra keneakai tsōa soatiroma. Nāskarifiakĩ Niospa meka kenenifo iskafakĩ: “Nōko Ifāfe afe yorafo tāpikōia.” Nāskakaxō, “Afe yorafāfe a afara chakafamisfo keskara potatirofo,” ixō kenenifo.

<sup>20</sup> Feronāfake āfe pexe efapa sharakōi faxō a mēra kecho sharakōifo faa, askaxō a kecho sharafo mēra afara sharafo fatiro. Akka a kecho chakafo mēra afara chakafori fatiro. <sup>21</sup> Mā mĩ chaka mĩ xatekōiax, nā fēta xinikĩ afara chaka potatiro keskara itamaroko. Nā sapa choka keskara sharakōi mĩ itiro. Nāskax Jesús keskara shara mĩ ikaino Epa Niospa mia yonomapaiyai keskara mĩ aōxō afara

sharafo faxotiro.

<sup>22</sup> A naetapafāfe afara chakafo shinākī nā apaiyai keskara faifono mīri askayamafe. Anori shinātamaroko Niospa fichipaiyai keskara shināfe, Jesús chanīmara fafāi, yorafo noikī, fetsafāferi shināsharakōiaifono, Jesús Ifofaifo ato fe mēstekōi isharakōife. <sup>23</sup> Anā ē mia yoinō, ea nikasharafe. A feratenāifo ato nikayamafe. Ato fe feratenāpaiyamafe. Askara yorafo samama ōitifishki-tirofoki. <sup>24</sup> Niospa meka yoimisto tosa feratetiroma. Anori askatamaroko keyokōi yorafo ato noisharafāi, ato tāpimasharatiro, tenekōisharata ato yoitiro. <sup>25</sup> Fētsa Niospa mekakōi nikakaspakī meka anorima fisti shināito, fenāmāshta ato tāpimasharafe. Mī ato askafaino āto chaka xatetiromo Niospa mefeta akaino. Askaxō Jesús chanīmara fakōinōfo. <sup>26</sup> Nāskafakī anā Niosnoa shināsharanōfo. Oa tarapa mēra ikia keskara Satanás ato fapai kiki. Nāskaxō ato amapaiyai keskafakī ato yonofafāini. Akka mia nikaxō Jesús ato ifitiro. Nāskaifono Satanás afianā ato afara yonomatiroma. Afianā tarapa mēra ikia keskara ikanima.

### 3

#### *Afeskakanimākai yorafo na mai keyoaino*

<sup>1</sup> Timoteo, ōisharafe. Ē mia yoi Jesús chaima oaino fekaxkōi ixii kiki. <sup>2</sup> Fetsa noitama āakōi kexemei, askatari fētsa āfe kori fisti shināfāi, āakōi anofi inimamis ikāi, Niosnoa chaka yoimis ikāi, askaxō āto apa yafi āto afa nikakaspamisfo ikāi, yonoxofiaifāfe aichora ato famisfoma ikāi, ato noikaspamisfo, Niosnoa shinātama chakakōi fistis shināmismo, <sup>3</sup> afe yorakōi noiyamafāi, fetsafo noiyamata axokaspafāi, fetsafo āa pāramis ikāi, āa apaiyai keskafakī enemisma ikāi, mitsisipakōi ikāi, afara mīshti sharafo noiyamafāi, <sup>4</sup> askata a afe rafeafo ato chakafafāi, samama ōitifishkimis ikāi, “Ēkai tosa keskarama,” ixō yoifāi, Nios

noitama afara chaka fisti fakī ato inimamapaimiskōi ipaikani. <sup>5</sup> Askata a Nios Ifofaafō ichanāifono ato fe ichanākaxō Niospa meka nikafikaxō shināsharakanima. “Nōri Nios Ifofai,” ixō āa mato pārakani. Askax āa chanīmisfo Nios Ifofayamafiakanax.

Askaiḡāfe ōi ato fe rafeyamafe. <sup>6</sup> Askara yorafāfe a fofāsakakī ato pāratirofō a kēro tāpisharamisfoma fanīrira ato yoimisfo ato anorima yoiaifāfe. Atirifāfe noko yoikōikanira ato famisfo. Nāskakē a xotofakefāfe noko yoikōikanira ikaxō a yoiaifo anori ato nikataifaafo. Nāskakē a kērofāfe āa shinākani iskakakī: “Nō fāsi chakakakainaito, noko tāpimasharanōfora,” ixō shinākani anorima āto shinā mēraxō shinākaxō nāskai fekaxtetitaiafo. <sup>7</sup> Nāskaxō a ato yoimis fētsari ato yoiaito, nikatai fakaxō Niospa meka sharakōi tsōa mēstekōi tāpinakafoma. A rama ikai fētsari yoiaito, nikakākiri aōxō tāpisharapaifikakī, tsōa tāpinakama Niospa mekakōi. <sup>8-9</sup> ¿Mā mī shināimē anori aakōi Egipto anoa xanīfāfe Faraón israelifo ato yonomaḡoni, mesemaxō? Askaito ōikī Niospa Moisés nīchini afe yorafo israelifo mai fetsa ari ato iyotanō. Ato askafaito Faraón ato nīchikaspani. Askaino a feronāfake rafe ano mokaya inifo; fētsa ane Janes ikaino fētsa aneri Jambres ini, nā rafe Faraón fe rafeafo ini. A rafe Moiséski ōitifishkinifo. Nāskaxō āto xanīfo Faraón āa pāranifo ato Moisés nikanōma. Askafaiḡāfe ōikī chipo āto xanīfāfe tāpini Moisés a feronāfake mokaya rafe finōkōia ini. Mokayafiakaxō afaa tāpiama inifo. Nā rafeta Faraón yoinifo Moisés nikanōma. Nāskafakīri fetsafāfe Niospa meka mēstekōi ato nikamakaspakani. Nāskakaxō Niospa meka mēstekōi tsōa yoima āto shināmā anorima shinākani. Oa Janes feta Jambres āto xanīfo anorima yoiaifono āto xanīfāfe ato tāpini keskafakī. Nāskafakīri na iskaratīa na anorima

yoimisfo āa chanīaifāfe nō ato tāpixii afāfe afaa tāpiafoma.

*Mā Pablo mekai xatekī Timoteo yoisharani*

<sup>10</sup> Timoteo, mā mī ea ōisharakōimiskī ē ato afo tāpimanaito. Mā mī ea ōimiskī afeskax ē isharaimākai, Nios fisti inimamapaifāi, Jesús noikī chanīmara fafāi, afarafo chakafo nokoaito ē tenefāi, ē yorafo noifāi, <sup>11</sup> a yora chakafāfe ea Jesúsxō chakafaifāfe ē tenefāi, askai ē omiskōimis. Mā mī tāpia ē afo tenemis. Askatari mā mī tāpia a Antioquía anoa ita, Iconio anoa ita, a Listra anoxō ea chakafafiaifāfe ē teneni. Nāskakē nā chakafoōxō nōko lfo Nios ea kexesharamis ē tenesharakōimis inō. <sup>12</sup> Na ē mia yoiai anori chanīma. Nō Cristo Jesús fe rafesharapaiyaito a Jesús noikaspamisfāfe noko omiskōimaxii. <sup>13</sup> A yora chakafāfe āa ato pārakani. Askatari chipo ato pārakī finakōixikani. Nāskakē afara chakafakī ato pāraifāfe ōikī Satanásri ato pāraxii.

<sup>14</sup> Nāskakē Timoteo, na meka Jesúsnoa mī tāpisharai. A mia tāpimanafo mā mī tāpikōia. Nāskakē mī tāpisharakōi. Anori meka chanīmara fafe, shināmakikima. <sup>15</sup> ¿Mā mī shināimē yomepishtaxō mī Niospa meka tāpiakī? A mekaōnoa mī shināsharamiskī Cristo Jesús chanīmara faax nō afe isharapakenaka. <sup>16</sup> Niospa ato shināmanaino feronāfakefāfe kirika ato kenexonifo Niospa meka ato tāpimaxikakī. Fetsafāfe afara chakafaifono, nō ato Niospa meka tāpimasharatiro anā askayamanōfo. Askatari nō isharapaikōikī nō Niospa meka ōikī nō tāpitiro afeska faxō nō Jesús Ifofasharatiromākī. <sup>17</sup> Akka Nios Ifofamisfāfe āfe meka nikasharakōikaxō, Nios yonoxosharakōitirofo.

4

<sup>1</sup> Timoteo, ē mia kaxeta yoima, nikafe. Jesús oatīa nōko xanīfokōi ixii Apa Nios feta, keyokōi yorafo namisfo yafi niafori ato yoixii. Jesús chanīmara fakanax afe nai mēra



nisharapakenakafo; akka a chanĩmara famisfoma chiifã mēra Niospa ato potai omiskõipakexanõfo. Nãskakē ãfe Fake Jesucristo feta Niospa noko õiaino ã mia yoi iskafakĩ: <sup>2</sup> Niospa meka fena fenakima ato yoife fenãmãshita shara. A nikapaiyaifo askatari a nikakaspaifori ato yoisharafe, mĩ ato yoisharaino ãto chaka xatenõfo Jesús Ifofasharax isharanõfo. Shinãsharata, Niospa meka mēstekõi yoife. <sup>3</sup> A yora chakafamai nokoaino yorafãfe Niospa mekakõi nikakaspairofo. A nikatamaroko meka fetsafo shinãtirofo, nã apaiyai keskafakakĩ. Anori fisti shinãkani. Nãskakanax ano fisti ichanãkaxõ anorima a fetsafãferi yoiaito nikakakĩ. <sup>4</sup> A Niospa mekakõi nikakaspakani a ãto xinifãfe shinãpaonifo keskari fakakĩ. <sup>5</sup> Nãskakē Timoteo, õisharafe. Afara afeskaraito Niospa mekakõi Ifofasharafe; mĩ shinãfenotama anori tãpisharafe. Mia omiskõimanaifono teneffe. Kafãkakaikĩ yorafo Jesúsnoa tãpimafe Ifofanõfo. Nã mia Niospa yoiai keskafafe shinãfãi.

<sup>6</sup> Iskaratĩa eõnoa ã mia yoi. Anã ã samarakaima mē chaima nai ea Jesúsxõ retexikani. <sup>7</sup> Mē yonosharakõitiani ãfe Ifo Jesúsxõ. ã chanĩmara fatitaifaa enekima. Keyokõi Niospa ea yoiai keskara mē aka. <sup>8</sup> Nõko Ifokõichi ea õimis ã Ifofasharakõiaito. Nãskakē ã akiki nokoaito ea afarafo inãsharaxii. Eres fisti ã fixiima. Nã nõko Xanĩfo finakõia oaitĩa keyokõi nã Ifofaafãferi fixikani. Aõ noikĩ a manaifori ato inãsharaxii.

*Pablonõ Timoteo fisti yoini kirika kenexokĩ*

<sup>9</sup> Timoteo, ea ano orisape. <sup>10</sup> Demãs afarafo fichipaikĩ ea nonoa õifaiti, Tesalónica ano kakĩ. Askatari Crescenteri kati Galacia ano. Askatari Titori Dalmacia ano kati. <sup>11</sup> Akka na Lucas fisti efe ika. Nãskakē Marcos ea efexõfe ea axosharaiyonõ Niospa meka ato yoikĩ. <sup>12</sup> Akka ã Tíquico Efeso ano nĩchiyamea ã. <sup>13</sup> Mĩ oaitĩa ea ãfe rakoti fexõfe a Troas ano ã faferati a Carpo pexe ano. Askata

ēfe kirikari ea fēxota, askatari kirika fetsari ea fēxota a fakka fichisharakōi ē akiki kenemis, aari ea fexōfe. Ē afo fichipaikai.

<sup>14</sup> Na yami famis Alejandro ea fāsi mekafamis. Aato ea chakafaito ōikī Niospa kopikiri omiskōimaxii.

<sup>15</sup> Ōisharafe. Alejandro miari chakafatiroki na meka shara Jesúsnoa nō yoiaito noko meka xatemapai kiki.

<sup>16</sup> Akka ea taefakī xanīfo ano iyonifo tsōakai eōnoa yoisharanima. Akka keyokōichi ea ōifainifo fōkakī. Askafiaifono ē Nios iskafakī yoini: “Epa, na ea nonoa ōifainaifo ato chakafayamafe,” ixō ē Nios yoiyamea. <sup>17</sup> Ea askafiaifono ēfe Ifāfe Jesús ea potayameama, ea kexexō. Ea askafiaifono ē ratetima ēfe Ifāfe ea kexeano āfe kerex ea ināno ē ato yoinō. A judeofomafāfe ea yōkaifāfe keyokōi nikanōfo ē Niospa meka Jesúsnoa ato yoiyamea. Ē askaito ea retepaikakī, oa poomānā noko pipaiyai keskara ea fatifo ea retepaikakī. Ea askafiaifono ea Niospa kexesharayamea ea tsōa retenōma. <sup>18</sup> Afara chakafo ekeki nokoaito ōikī ēfe Ifāfe ea kexetaifa a ē akiki nai mēra nokoaitīa. Fāsi nōko Nios sharakōi, tsoa fētsakai askafatiroma. Nāskakē tsōa nōko Nios finōtiroma. Ares fisti sharafinakōia. Nō aōnoa yoisharapakexanō. Nāskapakexapainō.

*Pablo mā mekai xatekī ato meka shara fomani*

<sup>19</sup> Timoteoshta, ea Prisca yafi Aquila ea yoixōfe, keyokōi yorafo Onesiforo pexe ano ikafori ea yoixōfe. <sup>20</sup> Erasto Corinto ano nēteyamea. Trófimo isinī ikī rakakē ē Mileto ano rataferayamea. <sup>21</sup> Nā mechaka ikamano ekeki ofe. Eubulonō, Pudentenō, Linōnō, Claudianō, keyokōichi Jesús chanīmara faafāfe mato yoisharapaikani.

<sup>22</sup> Nōko Ifo Jesucristo mefe ipaxanō. Askatari Niospa mato noikōikī mato kexesharakōinō keyokōi. Nā tii ē mato yoi.

2 TIMOTEO 4:22

11

2 TIMOTEO 4:22

Ěkřa Pablo

Niospa meka fena Jesucristoñoa  
New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: (Yaminahua)

Translation by: Wycliffe Bible Translators, Inc.

Yaminahua [yaa], Peru

### Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates  
eBible.org

---

PDF generated using Haiola and XeLaTeX on 3 Jul 2018 from source files dated 14 Jun  
2018

6c7b7ce2-9d87-5405-91e6-71ce1387adcc